

Meeqqanut suli atualinngitsunut perorsaanikkut inerikkiartuutaasunik ulluunerani neqerooruteqartarneq pillugu Inatsisartut peqqussutaat

Kalaallit Nunaannut Suliassaqaqtitsiniarnermik Inunnillu Isumaginninnermik inatsimmi nr. 580-imi, 29. november 1978-imeersumi § 2 naapertorlugu aalajangersarneqarpoq:

Kapitali 1

Siunertaq

§ 1. Peqqussutip siunertaraa meeraq qitiutillugu meeqqamullu angajoqqaatut oqartussaasut/meeqqamik pilersuisuiusut suleqatigalugit meeqqanut ataasiakkaanut annertunerpaamik pitsaanerpaamillu ikorfartuinissap qularnaarneqarnissaa, tassuunakkut meeqqap peqqissumik imaqluuartumillu inerikkiartornissaa qularnaarumallugu.

§ 2. Inatsisartut peqqussutaat manna naapertorlugu meeqqanut ulluunerani neqeroorutit siunertaraat:

- 1) meeqqap inuttut, piginnaasatigut aamma tarnikkut timikkullu pisinnaasaanut naleqqiullugu pisinnaasaasa tamakkiisumik inerikkiartortinnissaat,
- 2) inuttut pisinnaatitaaffit aamma tunngaviusumik kiffaanngissuseqarnermik pisinnaatitaaffit tunngaviillu, Naalagaaffit Peqatigiit Isumaqaqtiigissutaanni allassimasut, ataqqineqarnissaannik inerisaanissaq,
- 3) meeqqap angajoqqaavinut ataqqinninnermik, nammineq kulturikkut kinaassusianut, oqaasiinut pingaartitanut aamma nunami meeqqap najugaqarfiani nunamilu meeqqap kingoqqiffiani inuiattut pingaartitanut kulturinullu meeqqap nammineq kulturianit allaanerusunut ataqqinninnermik inerisaanissaq,
- 4) meeraq inuiaqatigiinni kiffaanngissuseqartuni akisussaalluni inooqataanissamut piareersassallugu, paaseqatigiinneq, eqqissineq, akaareqatigiinneq, suaassutsikkut naligiissuseqarneq - inuiaat, ammit qalipaataasa, naalagaaffit upperisallu akornanni naligiissuseq anersaaralugit, aamma
- 5) meeraq periarfississallugu misigisaqarnissamut sammisaqarnissamullu - meeqqap takorluuisinnaassusianik, pilersitsinnaassusianik inerikkiartorneranillu kaammattueqataasunik aamma pinngortitamik ataqqinnilersissallugu.

Imm. 2. Meeqqat suli atualinngitsut akornanni perorsaanikkut suliat Inatsisartut peqqussutaat manna naapertorlugu ingerlanneqartut tamarmik, angajoqqaatut oqartussaassuseqartut/meeqqamik pilersuisuiusut meeqqamullu attaveqaataasut suleqatigalugit pissapput, qularnaassallugulu atuarfimmut ikaarsaariarluarnissaq piginnaasat tunngaviusut ilikkariartornissamullu kajumissutsip inerisarlugillu

tapersersornerisigut, aamma meeqqap inooqatigiissutsikkut nalinginnaasumillu pisinnaasaanik pigiliussiniarnerani kaammattuillunilu inerisaanikkut.

Nassuiaatit atuuffillu

§ 3. Perorsaanikkut ineriartuutaasumik ulluunerani meeqqanut neqeroorutit tassaapput neqeroorutit sammisaqartitsiviusut, meeqqanut perorsaanikkut anguniagalimmik ingerlatsiviusut, assersuutigalugu meeqqerivinni, angerlarsimaffimmi paarsisarfinni pinnguarterfinnilu ingerlanneqartut. Apeqqutaanngilaq ulloq naallugu imaluunniit ullup ilaa neqeroorutaanersoq.

Imm. 2. Meeqqat sulī atualinngitsut tassaapput meeqqat 0-miit 6-inut ukiullit, imaluunniit atuarfik pillugu peqqussut naapertorlugu atuartitaasussaataanerup aallartinnera tikillugu.

Imm. 3. Meeqqat sulī atualinngitsut immikkut ittunik pisariaqartitsisut Inatsisartut peqqussutaannut matumunnga ilaapput.

Qullersaasutut akisussaaffik

§ 4. Meeqqanut sulī atualinngitsunut perorsaanikkut inerikkiartuutaasumik ulluunerani neqeroorutit Naalakkersuisut qullersaasutut nakkutigissavaat.

Imm. 2. Naalakkersuisut pisussaaffigaat makkua isumaginissaat:

- 1) Sulī atualinnginnermut tunngasut iluanni perorsaanikkut-tarnip pissusaasigut ilisimatusarneq.
- 2) Meeqqanut ulluunerani neqeroorutit nutaamik ilusillit inerisarnissaat, taakkununnga ilaallutik nunaqarfinni pissutsinut naleqqussagaasumik allaanerusumik meeqqanut ulluunerani neqerooruteqartarneq.
- 3) Perorsaasunik ilinniartitsinerit, taakkununnga ilaallutik najugaq qimannagu perorsaasunik ilinniartitsinerit.
- 4) Perorsaanermik ilinniagallit ilinniarteqqittarnerat ingerlaqqiffiusumillu ilinniartitaanerat.
- 5) Suliamik ilinniagaqanngitsunik allagartartaarutaasinnaasunik ilinniartitsinerit.
- 6) Kisitsisitigut paasissutissanik katersinissamut sakkussanik inerisaaneq.

Imm. 3. Suliassat imm. 2-mi taaneqartut suliarinissaannut perorsaanikkut-tarnip pissusaanut tunngasutigut qitiusumik inerisaavimmik pilersitsisoqassaaq.

Imm. 4. Inatsisartut peqqussutaat manna naapertorlugu suliassat isumaginissaannut pisariaqartunik, Naalakkersuisut kommunalbestyrelsi paasissutisseeqqusinnaavaat.

§ 5. Naalakkersuisut makku pillugit malittarisassaliussapput:

- 1) meeqqat kommunini meeqqanut ulluunerani neqeroorutitut peqataanerannut akiliuteqartarneq, tassunga ilaatillugit akiliutit kommunit meeqqanut ulluunerani neqeroorutitut aningaasartuutaat angajoqqaallu aningaasaqarnerat eqqarsaatigalugit aalajangiunneqarnissaat, angajoqqaat akiliutaasa isertitat naapertorlugit aaqqiiffigineqartarnissaat, akiliutissanik kinguaattoortoqartillugu meeqqamik anisitsisinnaaneq, aamma kommunimi meeqqanut ulluunerani neqeroorutit atorunnaarsitsineq anisitsinerlu pillugit aalajangersakkat.

- 2) Peqqinnissakkut Nakkutilliisoqarfik suleqatigalugu nappaatit tunillaassortut pillugit aalajangersakkat.

Imm. 2. Naalakkersuisut meeqqeriviit pilersinneqartarneri pisatpersornerilu pillugit tunaartarisassaliussapput.

Imm. 3. § 16 naapertorlugu paasissutissanik naapertuuttunik ingerlatitseqqittarneq pillugu Naalakkersuisut tunaartarisassanik aalajangersaasinnaapput.

Imm. 4. Kommunalbestyrelsip nalinginnaasumik perorsaanikkullu nakkutilliinera pillugu Naalakkersuisut tunaartarisassaliorsinnaapput.

§ 6. Kommunalbestyrelsip pisussaaffigaa qularnaassallugu meeqqanut sulí atualinngitsunut tamanut pisariaqartunik amerlassusilinnik ulluunerani neqerooruteqarnissaq.

Imm. 2. Kommunalbestyrelsip meeqqanut ulluunerani neqeroorutit tamaasa nalinginnaasumik perorsaanermullu tunngatillugu nakkutigissavai pisortat suliamut tamatumunnga naapertuuttut suleqatigalugit. Kommunimi angerlarsimaffimmi paarsisarfiit minnerpaamik ukiumut sisamariarluni nakkutilliilluni orninneqartassapput, taakkunanngalu minnerpaamik ukiumut ataasiarluni siumoortumik nalunaaqqaarani nakkutilliisoqartassalluni.

Imm. 3. Aammattaaq kommunalbestyrelsip makku qullersaaffigalugit akisussaaffigai:

- 1) Kommunimi meeqqanut inuusuttunullu politikkiliornissaq.
- 2) Ulluunerani neqeroorutit ataasiakkaat perorsaanikkut ukiumoortumik pilersarusiornissaat, taakkualu nalilernissaat, tak. § 18, imm. 2.
- 3) Nunaqarfinni meeqqanut ulluunerani neqeroorutit illoqarfimmilu ulluunerani neqeroorutit akornanni aalajangersimasumik attaveqartarnissaq, perorsaanikkut isumassarsioqatigiittarnissaq siunertaralugu.

Meeqqat ataasiakkaat pillugit suleqatigiinneq

§ 7. Meeqqat ataasiakkaat pillugit attaveqatigiit ataqatigiissakkamik suleqatigiinnissaat qularnaarumallugu, kommunalbestyrelsit pisariaqartitsineq naapertorlugu suleqatigiinnik pilersitsinnaapput, ingerlatsiveqarfiit ataasiakkaat akimorlugit meeqqat ataasiakkaat pillugit toqqaannartumik suliaqartunik inuttalikkanik.

Kapitali 2

Inissamik innersuussineq

§ 8. Kommunalbestyrelsi kommunimi meeqquerivinnut angerlarsimaffimmilu paarsisarfinnut inissamik innersuussisarpoq.

Imm. 2. Nalornisoqalersillugu kommunalbestyrelsip suliamik immikkut ilisimasallit pisariaqartitsineq naapertorlugu peqataatissinnaavai.

§ 9. Kommunalbestyrelsip suliasaraa meeqqat 0-miit 2-nik ukiullit meeraaqquerivinnut kommunimilu angerlarsimaffimmi paarsisartunut innersuunnissaat, meeqqallu 3-niik 6-nut ukiullit meeqquerivinnut kommunimilu angerlarsimaffimmi paarsisartunut innersuunnissaat.

Imm. 2. Pissutsit allakkut ajornartitsinngippata meeqqat 2-nik ukiullit meeqquerivinnut innersuunneqarsinnaapput.

Imm. 3. Qinnuteqartunut tamanut inissamik qularnaarisoqarsimatinnagu utaqquisut allassimaffiat pilersinneqassaaq.

Imm. 4. Utaqquisut allattorsimaffisa ilusissaat imarisassaallu pillugit kommunalbestyrelsi malittarisassanik aalajangersaasinnaavoq.

Tulleriiaarineq

§ 10. Kommunimi meeqqueriviit imaluunniit angerlarsimaffimmi paarsisarfiit inissaqalersillugit, kommunalbestyrelsi meeqqat utaqquisut akornanni toqqartuissaaq, kommunimi meeqquerivinnut imaluunniit angerlarsimaffimmi paarsisarfinnut naapertuuttumik ukiullit akornanni, ataani

tulleriiaarinissamik innersuussutit malillugit, taamaattorli meeqqat a-mi aamma b-mi pineqartut allanit tamatigut siulliunneqartassapput, angajoqqaatut oqartussaasut/meeqqamik pilersuisuisut akornanni pissutsit apeqqutaatinnaq. Aappariit katissimanngikkaluarlutik inooqatigiittut meeraat, angajoqqaatut oqartussaasut/meeqqamik pilersuisuisut katissimasut meeraattorluinnaq pineqassapput.

1) Ataatsimoortut a: Meeqqat - isumaginninnermut ataatsimiititaliamit innersuunneqartut - immikkut perorsaanikkut pisariaqartitsinertik pissutsilluunniit allat meeqqap inerikkiartorneranik ulorianartorsiortitsisinnaasut pissutigalugit.

2) Ataatsimoortut b: Meeqqat meeraaqqerivinniit kommunimiluunniit angerlarsimaffimmi paarsisarfinniit meeqqerivinnut ukiutik pissutigalugit nuuttussat.

3) Ataatsimoortut c: Meeqqat suliffeqartunik imaluunniit ilinniartunik kismaajusunik angajoqqaallit/pilersuisueqartut.

4) Ataatsimoortut d: Meeqqat angajoqqaatut oqartussaasui/pilersuisuisut tamarmik suliffeqartut imaluunniit tamarmik ilinniagaqartut.

5) Ataatsimoortut e: Meeqqat angajoqqaatut oqartussaassuseqartup/pilersuisuisup aappaa suliffeqartoq imaluunniit angajoqqaap aappaa ilinniagaqartoq.

6) Ataatsimoortut f: Meeqqat angajoqqaatut oqartussaasui/pilersuisui tamarmik suliffeqanngitsut imaluunniit ilinniagaqartuunngitsut.

Imm. 2. Kommunalbestyrelsen utaqqisut allassimaffianniit toqqartuinnermini ilutigisaanik qularnaassavaa, meeqqeriviit ataasiakkaat meerartaasa - perorsaanikkut anguniagassat pissutigalugit - ukiumikkut naammaginartumik siammaassimanissaat, nukappiaqqat niviarsiaqqallu sapinngisamik amerlaqatigiinnissaat, aamma meeqqat immikkut ittumik pisariaqartitsisut imaluunniit tapersersorteqartut naammaginartumik siammaassimanissaat.

Imm. 3. Illoqarfigisap nunaqarfigisalluunniit iluani meeqqerivimmu allamut aatsaat nuuttoqarsinnaavoq, tamanna meeqqap atugarissaarnissaanik peqqissusaanillu imaluunniit angallassinikkut pissutsit ajornakusoornerannik pissuteqarpat.

Kapitali 3

Meeqqeriviit

§ 11. Meeqqeriviit tassaapput suliffeqarfiit, sulisut perorsaanikkut ilinniagallit perorsaanikkut anguniagaqartumik meeqqanik ataatsimoortunik minnerpaamik 12-inik sullissiffigisaat, avatangiiserisat meeqqat sulisullu pisariaqartitaannut naleqqussagaassallutik oqartussaasunillu naapertuuttunit akuerisaassallutik.

Imm. 2. Meeqqeriviit kommunimit ingerlataasinnaapput imaluunniit tassaasinnaallutik suliffeqarfiit imminnut pigisut arfinilinnik amerlanernilluunniit meerartallit, kommunalbestyrelsimi ingerlatsineq pillugu isumaqatigiissuteqarfigineqarsinnaasut.

§ 12. Meeqqeriviit pilersinneqassapput 0-imiit 2-nik ukiulinnut meeraaqqerivittut, 0-imiit 6-inut ukiulinnut meeqqat ukiui naapertorlugit agguassiviusumik meeqqerivittut, 3-miillu 6-inut ukiulinnut meeqqerivittut.

Imm. 2. Meeqqeriviit meeqqanut ataatsimoortunut agguanneqassapput, meeqqerivinni meeqqat ataatsimoortut amerlanerpaamik 20-nik meerartaqarsinnaallutik, meeraaqqerivinnilu amerlanerpaamik 12-inik.

Imm. 3. Meeqqat immikkut ittunik pisariaqartitsisut inissanik §§ 1-ip 2-llu anguneqarnissaannut pisariaqartunik, kommunalbestyrelsimi imaluunniit meeqqeriviup imminut pigisup siulersuisuinit

aalajangiunneqartunik tunineqassapput – meeqqeriviup inassuteqareerneratigut. Meeqqat ataasiakkaat pillugit suleqatigiinnik, tak. § 7, pilersitsisoqarsimappat suleqatigiit aalajangiinnermi peqataatinneqarsinnaapput.

Meeqqeriviit illutaannut piumasaqaatit

§ 13. Meeqqeriviit tamarmik atorneqalernerminni ingerlaavartumillu nakkutilliinikkut qatserisartutut oqartussaasunit, peqqinnissamut oqartussanit kiisalu Sullivinnik Nakkutilliisoqarfimmit akuerisaassapput. *Imm. 2.* Kommunalbestyrelsip illut akuerissavai, pisortanillu piumasaqaatit piviusunnngortinneqarsimanerat nakkutigissallugu.

Imm. 3. Inissatut aalajangiussat amerlassusaannik imaluunniit illunik allannguisoqannginnerani qatserisartutut oqartussaasut, peqqinnissamut oqartussat kiisalu Sullivinnik Nakkutilliisoqarfik allannguutissanik akuersissuteqaqqaartassapput.

Meeqqeriviit akuerisaanerannut uppersarsaat

§ 14. Meeqqeriviit tamarmik akuerisaanerminnut uppersarsaateqassapput, meeqqerivimmi ersittumi nivingasussamik.

Imm. 2. Akuerisaanermit uppersarsaatip makku pillugit paasissutissat imarissavai:

- 1) Meeqqeriviup aqqa, najugaqarfia sumiiffalu.
- 2) Meeqqeriviup anguniagai
- 3) Meeqqeriviup pisortaa
- 4) Kommunimi ataatsimiititaliaq attavigisaq imaluunniit meeqqeriviup imminut pigisup siulersuisui.
- 5) Inissat amerlassusaat.
- 6) Sulisut amerlassusaat.
- 7) Piffissat ammasarfiit.
- 8) Pisortanit naapertuuttunit akuersissutit, taakkununga ilaallutik qatserisartutut oqartussaasunit, peqqinnissamut oqartussanit, Sullivinnik Nakkutilliisoqarfimmit kommunalbestyrelsimillu akuersissutit taakkualu ullui.
- 9) Meeqqeriviup ukiumoortumik pilersaarutaata sumi pissarsiarineqarsinnaanera taassumalu inatsisitigut tunngavigisai naapertuuttut pillugit paasissutissat.

Naliliineq uppersarsaasersuinerlu

§ 15. Meeqqeriviup meeqqat ataasiakkaat inerikkiartornerat pillugu ataatsimoortumik naliliinikkut naliliinerit uppersarsaasersuinerillu ingerlaavartumik isumagissavai, meeqqallu inerikkiartornera minnerpaamik ukiumut marloriarluni allaaserisassallugu.

Imm. 2. Meeqqap inerikkiartornera pillugu allaaserisat angajoqqaatut oqartussaasut/meeqqap pilersuisui inuillu suliamik ingerlatallit naapertuuttut suleqatigalugit malitseqartinneqartassapput.

Imm. 3. Meeqqeriviit pisussaaffigalugu minnerpaamik ukiumut marloriarlutik angajoqqaanik oqaloqateqartassapput meeqqap inerikkiartoqqinnerani suleqatigiinnissaq siunertaralugu.

§ 16. Meeqqap suliffeqarfimmiit suliffeqarfimmut allamut nuunnerani meeqqerivimmi meeqqap qimataani sulisut paasissutissanik naapertuuttunik suliffeqarfimmut nuuffiusumut ingerlatitseqqittassapput.

Meeqqeriviup pisortaa

§ 17. Meeqqueriviup pisortaa perorsaasutut ilinniagaqassaaq ininilu sulisut amerlassusissaattut aalajangiussaasunut ilaassanani.

Imm. 2. Meeqquerivinni kommunip pigisaani meeqqeriviup pisortaa kommunalbestyrelsimit atorfinitsinneqassaaq atuisut ataatsimoorfiata inassuteqareerneratigut.

§ 18. Meeqqueriviup pisortaata perorsaanikkut allaffissornikkullu akisussaaffigaa, meeqqeriviup illersorneqarsinnaasumik malittarisassallu atuuttut naapertorlugit ingerlanneqarnissaa. Meeqqeriviup pisortaata sulisunut tunngasut aamma atuisut ataatsimoorfianni aalajangiussat taakkua innersuussutaat naapertorlugit piviusunnngortinneqarnissaat akisussaaffigaa.

Imm. 2. Meeqqeriviup pisortaata aammattaaq akisussaaffigaa, meeqqeriviup perorsaanikkut ukiumoortumik pilersaarusiornissaa aningaasaqarnikkullu missingersersuusiornissaa.

Imm. 3. Meeqquerivinni kommunip ingerlassaani aamma meeqqerivinni imminnut pigisuni kommunalbestyrelsimit ingerlatsinissaaq pillugu isumaqatigiissuteqarfigineqartuni missingersersuutit suliarineqassapput kommunalbestyrelsip malittarisassiai naapertorlugit. Meeqqerivinni imminnut pigisuni missingersersuutit suliarineqassapput siulersuisut malittarisassiaat naapertorlugit.

§ 19. Meeqqeriviup pisortaata akisussaaffigaa meeqqat meeqqerivimmut allatseqqasut nalunaarsorsimanissaat, meeqqat aqqi, inuttut normui, angajoqqaatut oqartussaasut/meeqqamik pilersuisuisut aqqi, meeqqallu aninerani tamatumunnga pissutaasoq ilanngullugit. Aammattaaq meeqqat takkuneri nalunaarsorneqassapput, ullut tamaasa qanoq sivilutigitumik najuunnerat nalunaarlugu.

Stk. 2. Meeqqeriviit kommunimit ingerlanneqartut aamma meeqqeriviit kommunalbestyrelsip ingerlatsinissaaq pillugu isumaqatigiissuteqarfigisimasaasa meeqqat takkunnerinut nalunaarsuiffik ukiumoortumik perorsaanikkut pilersaarummik tapertaqartillugu kommunalbestyrelsimut nassiuttassavaat.

Meeqqerivinni kommunit ingerlassaanni sulisut amerlassusissaat

§ 20. Meeqqat ataatsimoortut tamarmik minnerpaamik sulisorissavaat perorsaasoq 1, perorsaanermik ilinniarsimasooq 1 ikiortilu 1. Sungiusarlutik sulisut tapersersortaasullu sulisut amerlassusissaannut ilaatinneqanngillat.

Imm. 2. Meeqqeriviup ammanerata nalaani tamatigut meeqqani ataatsimoortuni tamani minnerpaamik sulisut marluussapput, meeqqerivimmilu perorsaanermik ilinniagalik minnerpaamik ataasiussalluni.

Imm. 3. Meeqqerivik pisariaqartitaminik igaffimmi eqqiaasutullu sulisoqassaaq.

Imm. 4. Imm. 1-3-mi pineqartut aallaavigalugit kommunalbestyrelsip meeqqeriviit ataasiakkaat sulisuisa amerlassusissaat aalajangissavaa, pisortallu saniatigut sulisut atorfinitsinneqartarnissaat pillugu tunaartarisassaliussallutik.

Meeqqerivinni kommunit ingerlassaanni atuisut ataatsimoorfiat

§ 21. Meeqqerivinni tamani pisortap minnerpaamik ukiumut sisamariarluni atuisut ataatsimoorfiat ataatsimiigiaqqusassavaa, taakku tassaapput angajoqqaatut oqartussaasut/meeqqamik pilersuisuiit meeqqerivimmilu sulisut tamarmik.

Imm. 2. Atuisut ataatsimoorfiata suliassarai

1) meeqqerivimmi sammisassanik imaluunniit suliniutinik siunnersuillunilu aqqissuussineq - meeqqanut anguniagalimmik suliaqarnissamut aamma angajoqqaatut oqartussaasunut/meeqqamik pilersuisuisunut naleqqiullugu,

- 2) perorsaanikkut ukiumoortumik pilersaarutit suliarineranni peqataaneq,
 - 3) perorsaanikkut ukiumoortumik pilersaarutit malitseqartinnerat,
 - 4) pisatsersuinnermut avatangiiserisallu allanngortinnissaannut tunngasunik siunnersuuteqarneq aamma
 - 5) pissutsit meeqqat ulluinnarisaannut ersarissumik pingaarteqartut pillugit aalajangiinerit.
 - 6) meeqqueriviup pisortaata atorfinitsinnerani kommunalbestyrelsimut inassuteqarneq.
- Imm. 3.* Atuisut ataatsimoorfianni nalinginnaasumik amerlanerussuteqarneq naapertorlugu aalajangiisoqartassaaq. Kommunimi atuisut ataatsimoorfisa ulluinnarni ingerlatsinnerminni malittarisassaannik tamanut atuuttussamik kommunalbestyrelsi suliaqarsinnaavoq.
- Imm. 4.* Atuisut ataatsimoorfiat pisariaqartitsineq naapertorlugu ataatsimiititaliaagallartussanik, atuisut ataatsimoorfiannut nalunaartartussanik, pilersitsisinnaavoq.

Meeqqueriviit imminnut pigisut aqunneqarnerat

- § 22.** Meeqquerivinni imminnut pigisuni siulersuisunik qullersaallutik aqutsisuusussanik pilersitsisoqassaaq.
- Imm. 2.* Meeqquerivinni imminnut pigisuni meeqqueriviup pisortaa siulersuisunit atorfinitsinneqassaaq. Siulersuisut sulisut allat atorfinitsinneqarneranni tunaartarisassanik aalajangersaassaaq.

Kapitali 4

Angerlarsimaffimmi paarsineq

- § 23.** Angerlarsimaffimmi paarsisarfik tassaaavoq perorsaanikkut kaammattuiffiusumik paarsinissamik neqeroorut ullup-unnuallu ilaa angerlarsimaffimmi meeqqap angerlarsimaffiginngisaani imaluunniit tamanit katersuuttarfimmi ingerlanneqartoq.
- Imm. 2.* Kommunip angerlarsimaffimmi paarsisarfia tassaaavoq angerlarsimaffimmi paarsineq kommunimit pilersinneqarlunilu innersuunneqartoq, angerlarsimaffimmi paarsisartoq kommunimit atorfinitsinneqarlunilu akissaateqartinneqarluni.
- Imm. 3.* Angerlarsimaffimmi paarsineq namminerisamik ingerlanneqartoq tassaaavoq akilernerqarluni angerlarsimaffimmi paarsisarfik namminerisamik pilersinneqarlunilu ingerlanneqartoq. Namminerisamik angerlarsimaffimmi paarsisarfiit malittarisassat kommunip angerlarsimaffimmi paarsisarfinut atuuttut maleruassavaat.

Angerlarsimaffimmi paarsisartunik angerlarsimaffinnillu paarsiffiusunik akuersineq

- § 24.** Kommunilbestyrelsip angerlarsimaffimmi paarsisartut angerlarsimaffinnillu paarsiffiusut qinnuteqartoqareerneratigut allakkatigut akuerisassavai.
- Imm. 2.* Angerlarsimaffimmi paarsisartoq timikkut tarnikkullu pillorissuusaaq aamma perorsaanikkut kaammattuutaasunik sammisaqartitsinernik neqeroornissaminut piginnaasaqassalluni.
- Imm. 3.* Angerlarsimaffimmi paarsisartup illoqatigiunnagaasalu tamarmik peqqissutsimut uppernarsaat qaammatinik pingasunik pisoqaanerunngitsoq takutissinnaassavaat. Angerlarsimaffik paarsiffissatut akuerineqarsinnaanngilaq, angerlarsimaffimmi paarsisartoq illoqataaluunniit ukiut kingulliit marluk ingerlaneranni ilaqutariissutsimut tunngasuni, kinguaassiuutitigut ileqqorissaarnissamut aamma inuunermut timimullu pinerluuteqarsimasutut eqqartuussaasimappata imaluunniit angerlarsimaffimmi tunillaassuuttumik naapaateqartoqarpat.
- Imm. 4.* Angerlarsimaffimmi paarsineq tamanit katersuuttarfimmi pippat imm. 2-mi aamma imm. 3-mi aalajangersakkat taamaallaat paarsisartumut atuutissapput.

Imm. 5. Namminerisamik angerlarsimaffik imaluunniit tamanit katersuuttarfik meeqqanik paarsisarfissatut akuerineqartinnagu, kommunalbestyrelsip illutaasut nalileqqaassavai.

Imm. 6. Kommunalbestyrelsip nalilerpagu angerlarsimaffimmi paarsisartutut angerlarsimaffiilluunniit paarsiffiusut akuerineqarsinnaanerannut tunuliaqutaasut peeruttut, akuersineq atorunnaarsinneqassaaq.

Angerlarsimaffimmi paarsinermik innersuussineq

§ 25. Meeqqat suli atualinngitsut katillugit sisamat angerlarsimaffimmi paarineqarnissaat kommunalbestyrelsimi akuerineqarsinnaavoq. Angerlarsimaffimmi paarsiffiusumi ataatsimi nammineq meeqqat 6 inorlugit ukiullit meeqqallu paarisat tallimat qaangissanngilaat.

Imm. 2. Angerlarsimaffimmi paarsisoq amerlanernik paarsaqarsinnaavoq imaluunniit angerlarsimaffimmi paarsisartumut allamut taartaasinnaavoq piffissami killilimmi, isumaqatigiissut naapertuuttoq naapertorlugu.

Atuisut ataatsimoorfiat

§ 26. Angerlarsimaffimmi paarsisarfinni tamani angerlarsimaffimmi paarsisartoq minnerpaamik ukiumut sisamariarluni atuisut ataatsimoorfiannik ataatsimiigiaqqusissaaq. Atuisut ataatsimoorfiannut ilaapput angajoqqaatut oqartussaasut/meeqqamik pilersuisuiit tamarmik aamma angerlarsimaffimmi paarsisartoq. Illoqarfimmi nunaqarfimmiluunniit ataatsimi angerlarsimaffimmi paarsisartut arlaqarpata, angerlarsimaffimmi paarsisarfiit tamarmik ataatsimoorlutik atuisut ataatsimoorfiannik pilersitsisinnaapput.

Imm. 2. Atuisut ataatsimoorfiata suliassarai

1) angerlarsimaffimmi paarsiffimmi sammisassanik imaluunniit suliniutinik siunnersuillunilu aaqqissuussineq - meeqqanut anguniagalimmik suliaqarnissamut aamma angajoqqaatut oqartussaasunut/meeqqamik pilersuisuisusunut naleqqiullugu,

2) pissutsit meeqqat ulluinnarisaannut ersarissumik pingaaruteqartut pillugit aalajangiinerit.

Imm. 3. Atuisut ataatsimoorfianni nalinginnaasumik amerlanerussuteqarneq naapertorlugu aalajangiisoqartassaaq. Kommunimi atuisut ataatsimoorfisa ulluinnarni ingerlatsinerminni malittarisassaannik tamanut atuuttussamik kommunalbestyrelsi suliaqarsinnaavoq.

Imm. 4. Atuisut ataatsimoorfiat pisariaqartitsineq naapertorlugu ataatsimiitaliaagallartussanik pilersitsisinnaavoq.

Kapitali 5

Sammisagartitsinissamik neqeroorutit allat

§ 27. Kommunalbestyrelsi meeqqanut suli atualinngitsunut sammisagartitsinissanik allanik neqerooruteqarsinnaavoq, sumiiffinni ataasiakkaani kissaatigisat pisariaqartitsinerillu tunuliaqutaralugit. Sammisagartitsinissamik neqeroorutit allat akeqanngillat.

Imm. 2. Sammisagartitsinissamik neqeroorutit allat tassaapput piffissap ilaa neqeroorutit, meeqqanut suli atualinngitsunut inersimasumik ilaqartunut saaffiginnittut, meeqqap ineriikkiartorfissaasa ataatsip arlalilluunniit iluanni anguniagaqartumik sammisagartitsinermik imaqartut.

Imm. 3. Sammisagartitsinissamik neqeroorutit allat pilersinnissaat aallartinnissaallu siunertaralugu ataqatigiissaarisussamik toqqaanissaq kommunalbestyrelsip pisussaaffigaa. Ataqatigiissaarisup sumiiffinni

ataasiakkaani peqatigiiffiit, inuit isumalluutigineqarsinnaasut suliamillu ilisimasallit naapertuuttut allat suleqatigissavai.

Kapitali 6

Aalajangersakkat tamanut atuuttut

Aningaasalersuineq

§ 28. Meeqquqerivinnut, angerlarsimaffinni paarsisarfinnut aamma sammisaqartitsinissamik neqeroorutitut allanut Inatsisartut peqqussutaat manna naapertorlugu ingerlanneqartunut aningaasartuutit kommuninit akilerneqassapput.

Imm. 2. Namminersornerullutik Oqartussat meeqquqeriviit pilersinnerinut tapiissuteqarsinnaapput.

Misileraalluni aaqqissuussinerit

§ 29. Kommunalbestyrelsip inassuteqareerneratigut, Naalakkersuisut kommunini meeqqanut suli atualinngitsunut ulluunerani neqeroorutitik misileraalluni aaqqissuussinerit akuerisinnaavaat.

Imm. 2. Kommunimi misileraalluni aaqqissuussineq sivilunerpaamik ukiuni pingasuni atuussinnaavoq.

Imm. 3. Kommunimi misileraalluni aaqqissuussinermut atatillugu, tak. imm. 1, ukiut tamaasa nalunaarusiortoqartassaaq Naalakkersuisunut tunniunneqartussamik.

Maalaaruteqarsinnaaneq

§ 30. § 10 aamma § 24, imm. 1 naapertorlugit kommunalbestyrelsip aalajangiineri Inunnik Isumaginninnermi Maalaaruteqartarfimmut maalaarutigineqarsinnaapput, Inunnik isumaginninnerup aqunneqarnera aaqqissugaaneralu pillugu Inatsisartut peqqussutaanni aalajangersakkat naapertorlugit.

Imm. 2. Inatsisartut peqqussutaanni matumani aalajangersakkat allat naapertorlugit kommunalbestyrelsip aalajangiineri ingerlatsinikkut oqartussanut allanut maalaarutigineqarsinnaanngillat.

Imm. 3. Inatsisartut peqqussutaat manna naapertorlugu malittarisassaliat naapertorlugit kommunalbestyrelsip aalajangiineri ingerlatsinikkut oqartussanut allanut maalaarutigineqarsinnaanngillat.

Atuuttuulersitsineq

§ 31. Inatsisartut peqqussutaat manna atuuttuulissaaq 1. januar 2009.

Imm. 2. Ilutigisaanik atorunnaarsinneqarput

1) Ulluunerani paaqqinnittarfiit, ulluunerani angerlarsimaffimmi paaqqinniffiit il.il. pillugit Inatsisartut peqqussutaat nr. 7, 21. maj 2002-meersoq kingusinnerusukkut allannguutai ilanngullugit,

2) Ulluunerani paaqqinnittarfiit aqunneqarnerat, siulersugaanerat ingerlanneqarnerallu pillugit Namminersornerullutik Oqartussat nalunaarutaat nr. 5, 16. april 2007-meersoq, § 2 pinnagu, taanna atorunnaarsinneqassaaq 1. marts 2009,

3) Kommunit aaqqissuussaannik ulluunerani angerlarsimaffimmi paarsisitsisarneq pillugu

Namminersornerullutik Oqartussat nalunaarutaat nr. 65, 29. december 1994-meersoq aamma

4) Meeqqat ullukkuinnaq paaqqinnittarfinnut/ulluunerani angerlarsimaffimmi paaqqinnittarfinnut kommunemit ingerlanneqartunut inissinneqartarnerat pillugu Isumaginninnermi Pisortaqaqruup kaajallaasita nr. 129, 11. december 1978-meersoq.

Imm. 3. Sunngiffimmi sammisaqartitsinerup aaqqissugaanera pillugu Inatsisartut peqqussummik atuuttuulersitsinissaasa tungaannut kommunalbestyrelsip suli pisussaaffigivaa meeqqat 7-iniik 15-inut ukiullit fritidshjemminut innersuuttarnissaat, tak. § 9, imm. 1. Kommunalbestyrelsi utaqqisunut allassimaffiliussappat meeqqat taakku ataatsimoortunut b-nut ilanngunneqassapput, tak. § 10, imm. 1, nr. 2.

Imm. 4. Inatsisartut peqqussutaat imm. 2, nr. 1-imi taaneqartoq naapertorlugu aalajangersakkat atuuttuulersinneqarsimasut imaluunniit suli atuutsinneqartut Inatsisartut peqqussutaat imaluunniit Inatsisartut peqqussutaat alla tunngavigalugu taarserneqarnissamik atorunnaarsinneqarnissamilluunniit tungaanut atuutissapput.

Namminersornerullutik Oqartussat, 5. december 2008

Hans Enoksen

/

Tommy Marø

Namminersorlutik Oqartussat

Imaneq 4

3900 Nuuk

E-mail: nsninatsit@nanoq.gl

Linkit iluaqutaasussat

Kalaallit Nunaanni inatsisinut nalunaarutit

Namminersorlutik Oqartussat inatsisinut toqqorsiviat

Naalakkersuisut